


太平天國別史

明清珍本小說集



226





A541 212 0023 8082B

賊情彙纂

賊情彙纂序

此書無刻本蓋咸豐初年湘軍東征時據偵探之報告而鈔輯成編者官樣文章諒難盡信然傳鈔之本歷劫僅存事過境遷愈足珍視讀者斷章取義可也原書存譚君無畏處茲假以鈔印並節其原序以見其緣起書本十二卷文句鄙俚一仍其舊惟空疏習見之語則稍從刪落備好事者覽觀焉

此書原名賊情彙纂本宜存其真緣恐意晦而致誤解輒改題太平天國別史云編者又識

篡彙情賊

# 序

賊何所恃所恃者詭祕不易知耳自粵至楚殘破數千里肆虐逾兩年我官中猶不能確指賊目爲誰某况其餘乎咸豐癸丑正月收復武昌鄂人之脅以行者絡繹逃歸於是留心時事之士始獲諮詢筆記迨賊至鄂特弛其禁緣自鄂以上賊數無多所立軍目井井便於稽察不能如鄂人之易逃自是以還裏脅愈衆逃者愈多而賊情浸漸以洩時德堅充湖北撫轅巡捕官因好問賊情彼都人士凡有采輯輒手錄寄然人言各殊虛實參半比年于役大江南北並隨吳文節公至堵城常易裝往來賊巢所見行陣之士被虜逃人受害鄉民不可勝計留心訪究隨時記載居然成帙又以供役節轅時屢發俘賊難民鞫問摘錄供詞甚夥遂綜核而編輯之成賊情集要一册自慚末職粗才無辦賊之才

具冀効一得或可爲知己知彼之助嘗上諸大府輒嘉納之亦偶有置  
而弗閱者甲寅九月上浣欽差辦理軍務前少宗伯大帥曾公克復武  
漢後駐節漢江整旅誓師卽日下剿德堅方自江北旋省爰錄賊情集  
要介劉霞仙先生上之初無自薦之心竊謂大帥獨能辦賊必能知賊  
亦必樂人之知賊聊爲芻蕘之獻耳嗣大帥連克蘄州田鎮所向皆焚  
巢掃穴俘獲賊中文籍汗牛充棟更得彼中有心計者來歸出俘件使  
辨之所指悉不謬以前上之冊互證亦多符合遂檄調赴武穴行營設  
采編所編輯賊情彙纂一書以德堅爲總纂官〔下略〕

咸豐五年乙卯七月中浣甘泉張德堅識

# 賊情彙纂

## 雜載

賊皆山僻粗野。其稍知文墨者。皆充先生。多不出館虜掠。故挨戶搜括者。皆排刀手。性貪。最愛金銀。美服次之。姑無論古玩書畫毫無辨識。即貴重服飾亦平生所未見。凡見彝鼎圖書。賊尤不愛。每打破而後快。不識洋表爲何物。將內瓢挖去。誤認外殼爲真銀。懷挾以去。他如宋明磁器及宋元明名人書畫墨蹟。宋拓蘭亭各帖。皆希世之寶。薦紳名臣傳家手澤。亦一家之寶。一遇逆賊。非毀卽糜爛之。至可恨則莫過殘毀書籍。各教目我書爲妖書。近日沿江各郡邑藏書之家。如漢陽葉雲素先生。揚州阮文達公。秦敦夫。程穆堂兩先生各第。皆牙籤萬軸。多人間未見書。不啻瑯嬛福地。而逆賊一至。皆付之一炬。卽用以熏蚊燒茶。甚至遺矢後用字紙擦之。毀褻斯文。上大干怒。故有雷極之賊。甲寅五月二十一日未刻。天暗將降大雨。有賊於漢口鎮花樓空地遺矢甫畢。繫褲欲行。忽一雷下擊斃之。羣賊照耀聚觀。見遺矢處。有監本易經數頁。上多汗穢。始知此賊以聖經指拭。神怒隨之。故立殛也。滔天狂寇。安得人人而殛之。雖神祇亦須

聽之時數。若此賊焉。誠褻聖悖天特甚。故一懲創以儆其餘耳。壬子十二月。賊陷武昌。初十日。於獵馬場設高臺。賊日登其上。曰講道理。鳴鑼於市。命闔城人往聽。內有漢陽生員馬姓者。擠出人叢。疾至臺下。云有要言關白。賊目令其前。問有何說。馬生云。爾才說之言。一派傷天害理。犬吠之聲。何道理之有。試問自有人。即有五倫。爾賊頭於羣醜皆稱兄弟。是無君臣。父子亦稱兄弟。媳亦稱姊妹。是無父子。男女分館。不准見面。是無夫婦。朋友兄弟離散。是無朋友兄弟。可謂五倫俱絕。即依爾所述。亦只有兄弟一倫。況捨親兄弟不認。而別呼他人爲兄弟乎。如此悖謬。是真無用之狂賊也。於是罵不絕口。賊日大怒。傳令將馬生五馬分屍。四肢各駕一馬。辮髮繫一馬。用人鞭之。詎五馬四蹄攢躍不肯前。而馬生肆詈如故。賊不得已。用刀分裂其屍云。賊黨除起首桂澗諸人係真心入夥。餘不必湖南湖北。即廣西人亦多脅從。擄其眷口。焚其房屋。勢不得不隨行。以安居之民。忽遭荼毒。脅之爲賊。其恨賊可知。然徒恨無益。姑無論防閑之嚴。不得身爲荊軻聶政。人情惡死樂生。又誰肯捨命刺賊耶。曾聞應山譚生云。楊賊向所親密言曰。吾亦知新收兄弟心不服而怨恨。全在繩以苛法。劫以嚴令。驅策而挫折之。使不遑有他

## 纂彙情賦

志如有相約變妖者殺之。雖各有異心。彼此疑懼。誰敢先出諸口。況人人心雖恨我而不能禍我。人人身體精神皆爲我役使。是恨我者虛。助我者實。妖之待人。人人感之。未必妖營辦事之人能如我諸兄弟之盡力。是感妖雖有實心。並無實濟。此妖所以屢敗我之所以屢勝與。（按妖謂當時官軍也）

賊皆脅從。是已。然亦有計喫無賴之徒。或迫於賭債。或避官司勾捕。或在鄉黨作大悖理事。不見人。遂皆以賊爲逋逃藪。又有喪心貪利愚民。欲借賊勢擄掠自肥。他如海洋大盜。凶惡獄囚。每陷城池。多來投營。即或亦由暫脅。方以類聚。日久濡染。未有不真心願從者也。賊亦專用此數等人。喜其易惑而無室家之繫戀。且愍不畏死。每用以衝鋒破陣。餽以顯官。嗟乎。賊匪蹂躪數千里。良民固多。若爾人焉。又何止數萬。從賊則富貴。捨賊則無所歸。斷無解散之理。雖鹵莽拒我。易爲我殲。然且死且添。今之與我兵角力者。正此輩也。自古叛逆。從無婦女並擄者。亦未聞行事以千萬婦女隨行而可制勝者。賊之初意。不過欲以衆勝寡耳。況廣西婦女亦足強有力。儘可用爲伍卒。逮陷湖北江南。所得婦女何止數十萬。要皆膏粱脆弱。卽屬村婦。亦不敵



廣西賊婆之凶悍。擇美麗者充妾媵。餘皆無用。故役使工作磨折以死者不可勝計。於是知婦女不可用而不擄。且憎已擄之婦女爲累。滅其糧。日給米四兩。多設女館。以女官領之。其各賊目之眷口。悉充僞王府女官。皆隔別不令共處。倘私約就宿。則謂之犯天條。男女皆殺。僞冬官副丞相陳宗揚。竟因夫婦同宿。駢首就誅。各僞王盛置姬妾。而使羣下絕人倫之源。且給之曰。天下一日平定。方許完娶。未娶者方准婚配。功高者始准置妾。往往楊賊議奏某官功高。應先准娶妻。其實並未見准。其犯天條得用之賊。又恒貸之。罰以將來大家娶妻之日。遲娶三年。及不准多娶一妻。其意謂男女人之大欲。以此誘之。實以此迫之也。現無淫欲之事。既可保人人精壯。許以事定得妻。庶諸惡少捨死戰鬥。以冀一朝遂願耳。然稍有知識者。未始不知事不可成。妻不可得。甚至已妻轉爲所得。安得不痛恨而深銜之。特徒恨無益耳。且因無益灰心。亦慚忘其恨也。

湖北武漢江南江寧鎮江揚州等處。多富商大賈。士文民逸。享受承平之福二百餘年。其驕奢淫佚。恣情暴殄。匪夷所思。莫可窮詰。故此數處受害最久。被禍尤慘。至可憐莫過閩閩子女。錦

衣玉食。不離姆保。一旦倉皇被擄。男或用爲公子老弟。猶可偷生。婦女則概歸女館。隔絕親人。分與有殼之穀。令其舂糞。有援引者。或入綉錦衙。餘皆迫令放足。役使挑鑄背鹽。挑濠溝。削竹籤。要皆夢想不到之苦。一朝受之。其不死也幾希。及其死也。却有數等。上等烈婦閨秀。不待入館。先即自裁。其次或勉強入館。知事不可爲。乘間就死。又其次則忍辱偷生。因不耐折磨。不服粗糲。挫折而斃。至下則苟延一息。甘爲役使。甘受捶楚。甚至背鹽美婦。行烈日中。滷汗交流。肩背無皮。如著紅衫者。嗟乎。天地間至慘安有此耶。然亦以見人之一死。實非易事。罪孽未盡。真求死不能也。

江寧境內。又有一婦。背負嬰兒。被賊驅策入館。此婦遲回不行。賊罵之。婦亦回詈。賊遂挺身戳此婦。壓兒於肩下。呼娘不絕。呱呱亂啼。而不知其母已死。一婦行於道。懷繡數月之兒。且走且泣。忽袖出一剪。將欲自刺其吭。忽以淚眼熟視抱中兒。遂大哭。擲剪於地。仍向前行。賊之殘虐。致天壤間有此慘境。真不忍下筆矣。

賊擄我官吏紳衿讀書有心計人。或挫折以死。或分爲各館。充當書手。號曰先生。所辦無非寫

奏章詔諭封條出告示造家冊兵冊等事。一切軍令概不與聞。蓋防有用之才之算已也。又詭云天下平定。先生皆授文官。此亦候事定而得妻之意。文弱之士。苟且偷生。暫圖目前溫飽。亦斷不肯爲設一謀。且有故意寫字訛別者。如僞示動稱天王列王下理天下人民。下理理字。有寫作理字。逆賊慘虐不堪。指爲下理人民。誠不誣也。然先生旣辦筆墨。必能知其軍務。誠恐爲我軍所得。知彼虛實。故防範極嚴。鮮有能逃者。才士文人一入此中。非死卽終淪爲賊。可勝歎哉。假如江湖星卜者流。則甘爲先生。雖縱不逃。又當別論矣。

賊亦人也。其情性亦有善惡悍懦。故百姓遇賊。則視其人之數命當死不當死。如不當死。則所遇者善懦。明明是官是兵。遇善懦儘可得生。實係商賈百姓。遇惡竟無不死。如前之破武昌也。有周姓兄弟二人充糴道吏。其姊丈某姓素業做衣舖者。賊至其家。三人跪接。周氏兩兄弟首尾跪。其姊夫跪其中。賊至訊之三人。皆云向來貿易。賊略視其姊夫。一刀決其首。捨周氏兄弟而不殺。周充書吏。賊中謂之妖。某素貿易。所謂非妖也。賊廣西人。無一面識。安得有仇報。此理殊不可解。要皆命數當然。而遇前生冤孽。一見卽覺可憎可殺耳。

## 賊情彙纂

賊初起。猶有長夫。自破武昌後。褻脅愈衆。則兵夫不分。凡挑抬工作。皆各館兩司馬督衆爲之。咄嗟立辦。其需用各物。必先所急。毫無顧惜。諺語云。用著生鐵。便打鍋。賊誠有之。今則到處徧立鄉官。是我民盡爲賊助。凡用竹木鐵鋤。一切器具。僞文一下。立即辦齊。無敢違者。大可怪者。三五零賊下鄉。千百壯夫紛紛遠避。或俯首聽命。甚至賊中三尺童子。無敢與忤者。蓋鄉民非畏此數賊。特畏大股報仇也。賊之狠毒。專意尋仇。曾受我創之處。凡堅守之城。團練之鄉。一朝陷墮。必倍加燒殺。其意無他。不過使出力官民寒心。使他處不敢與抗耳。

賊見廟宇即燒。神像即毀。其毀神像者。亦欲以威劫人也。神祇在天上。何自無靈。賊黨不知。鄉愚亦不知。以爲神且斫頭折足。何況於人。神且不敢爲禍。人何敢違。其燒廟宇者。一則以威劫衆。以火警人。一則防鄉民團練。以廟宇爲公所。及官兵設伏於其中也。

江寧揚州才士被擄者最多。逆黨肆虐。日擊心傷。不敢明言。往往託諸吟咏。甚至以香奩詩爲寓意者。惜逃出之人不能全記。茲就其記憶者載之。朝暉隱約逗檐端。絳幘雞人起曉餐。警起睡魔呼去去。歸來仙步惜珊瑚。蝦蟆坐上聞新法。蟋蟀燈前憶舊歡。來日鴻溝還有約。暫謀將

## 賊情彙纂

息到更闌。此指清晨役使婦女挑磚瓦聽講道理。及來日挑濠溝也。其斷句云。惱殺一灣衣帶水。青藤隔斷小虹腰。此指禁女人過橋以藤條拍打也。三千怨女如花貌。百八佳人墜溷愁。此指僞王選妃得一百八人也。手執筠籃循曲徑。眼看桃葉渡迷津。此指文秀人借買菜以便逃去也。燕子紅襟衿寵貴。鵝兒黃帕助嬌羞。此刺名教中人降賊授僞官也。居然小婢稱如願。大有佳人號莫愁。此指賤者爲賊倚任貴者備受磨折也。曉看陌上春如織。背負花枝盡米囊。此指役使婦女負米也。絕少君苗焚硯志。翻成臣朔上書時。文章當爲科名設。氣節都因衣食移。此文士自傷不得已而赴僞試也。他如霜妬菊花寒更艷。風吹屍氣腐猶香。死縱拔心猶是草。生非薄面不爲花等句。似皆有所指云。

廣西渠賊授散職者。居江寧城中。無所事事。飯後三五同羣。馳馬遊街。有句云。朝餐甫畢燕辭巢。七尺吳綾馬上拋。公子聯翩齊縱轡。教人錯認試春郊。詩不佳。然可知其愒遊之狀。賊擄得騾馬。有芻豆則餵之。無則任其饑疲。每乘必馳。不知愛惜。一入賊手。其不瘠斃者幾希。正不獨受鹽車之困也。

賊婆皆粵西深峒村媼。足健步。無異男子。初至江寧。即傳僞令。婦女不准纏足。違者斬首。已纏之足。忽去束縛。幾不能移跬步。而賊黨督令挑括。其呼號之慘。可以想見。

粵西乃劇盜藪。多響馬隱語。各門已分載之。凡盜首犯罪。大衆斂斂。經營調護。謂之科炭。其意無他。言雪中送炭也。馮雲山收入桂平縣監。羣醜集資脫之。凡辦錢者。當時有簿籍。到江寧後。查叙科炭功。皆陞僞官。並偏行僞誥諭。令其採訪科炭者。奏封官職。無使一人向隅云。

逃兵率有兵冊家冊。每月終送書衙稽人數。如有逃人。上月造冊。即將其人名下寫三更二字。初不甚解。旣而訪知係楊賊跪稱天父說過。變妖之人。謂之三更逃黑夜。並造言曰。任爾三更逃黑夜。難逃天父眼睜睜。

賊初至湖南。擄挖煤人。防其逃。火用印烙腦門上。擄得强悍人。亦用火印。破岳州後。裹脅日衆。往往繩之烙印。至死不從。賊知不可。始廢去此令。近於武漢擄人。用刀割去辮髮。使不得逃。其計愈毒。被脅蓄髮。猶可下赦令。剃髮免死。今被擄者皆無髮辮。一時安能長成。出示解散。尤爲不良。賊立鄉官之處。見有剃頭者。不盡殺。輒用粗糲沙石磨其頭皮。頃刻血肉狼藉。而以鹽擦。

之。造虐如此。百姓安得不畏。

賊之僞文書。動稱天父天兄。文義荒誕。字句訛別。凡我吏民見之。無不唾罵非笑之。以爲無知狂寇。不足介意。殊不知賊之詭計。正以此惑人。一則惑彼中愚人。使崇信之。不敢背叛。一則惑我將帥士卒。使人人藐視之。疎於防範也。

奸淫之禁。賊令甚嚴。謂之犯天條。和姦并誅。強姦則殺行姦者。賊匪非惜名節。特欲人人精壯耳。殊不知犯者自犯。而尤多不可究詰。每踞一城時。有抬人頭兩顆。鳴鑼遊行於市。斬犯條某人示衆。或一女牽一長髮出首。指爲強姦。一見僞官。斷無生理。然男子強姦和姦之案。則從無犯者。蓋賊多無賴惡少。此風最甚。凡見俊美子弟。如獲至寶。或認爲公子。或帶爲老弟。同居一室。雖有分床之令。更深夜靜。其誰察之。況夫比比然。互相回護耶。若遇有器識童子。宛轉拒之。賊亦不敢明害。必將其送於極苦極險之地。借刀殺之。而後快。然幼孩何知。啖以果餅。劫以刀劍。其不從者。幾希。坐是而行姦之賊。又往往爲童子所挾制。動云出首甘與偕亡。則賊技窮而奉順無不至矣。嗟乎。賊踪所至數千里。湘楚少年尤多樸素。若江寧揚州一帶。其傅粉玉貌之

幼童。何可勝計。乃一旦供虎狼犬豕之愛玩。略無顧惜。任意糟蹋。言念及此。有時怒皆欲裂。有時悄然而悲耳。

賊亦嚴搶奪之令。必俟官軍退出三十里外。始任意擄劫。若官兵在前未退。有敢取尺布百錢者。皆殺無赦。蓋賊之擄掠在無兵之處。兵退財物將安往。其計甚合兵法。若一見財物即取。斷無不敗之理矣。賊真黠者。能知此意。獨怪賊令如此。其下竟不敢犯。想亦由積威所劫。惟命之是從也。

首逆數人竊天主教緒餘。倡主邪說。呼天爲父。耶穌爲天兄。洪逆爲二兄。洪大全爲三兄。楊秀清爲四兄。蕭朝貴乃洪逆妹夫。呼爲貴妹夫。其意欲尊天爲父。而強拉二千年上海外傳教之耶穌爲長兄。與諸逆序雁行。以其妹爲天女。蕭朝貴爲天婿。悖逆至此極矣。荒誕至此亦極矣。尤可異者。朝貴久經授首。其妻孀居。與洪逆眷屬俱。癸丑七月。楊逆多蓄淫嫗。縱慾成血淋症。久醫不痊。乃具本章於洪逆。奏請其孀妹爲之療治。其詞略曰。當日貴妹夫曾得此疾。乃天女貴妹醫調痊愈。不揣冒昧。請貴妹降臨弟府。醫小弟之疾。一俟醫痊。卽送回天朝。洪逆批曰。清



胞勤勞天事。致得此症。煩貴妹速赴清胞府內醫治調護。不得怠慢。又批七言四句曰。清胞千  
要顧精身。萬事節輕葆。性真。縱有高天時。看顧。蜂磨時久。讓花新。尋繹詩義。無非戒楊逆保身  
節慾云爾。然竟使孀妹爲楊逆醫血淋之疾。作何療治。又可想而知。逆賊淫亂。安有人理。古之  
叛逆。其下殺其酋長。淫其妻妹者。有之。然未聞公然具稟奏請姦宿其孀妹。而其主批准者。雖  
亘古奇聞。亦以見洪逆受制於楊逆。無事不從也。

逆賊屠殺人民。每鳴鉦喊令傳集某處。然後盡殺之。最慘踞揚州時。城內糧盡。飢餓百姓朝赴  
各賊館號泣乞食。賊日厭之。乃鳴鉦傳令曰。四十以上八十以下男婦齊赴南門大街空屋。來  
日五更按名散給口糧。於是飢民爭赴。約二三萬人。各據空房待發米穀。詎賊目將兩頭柵欄  
關閉。各以千餘賊執械扼守。黃昏後盡將空房縱火。次日中甫息。呼號之慘。順風聞十餘里。灣  
頭官兵疑我軍得手。故清晨不期而會。

或問賊目何行軍不用帳棚。對曰。此正軍師東王妙計。不用帳棚。隨處民房可住。凡民房皆可  
拆作板屋。其利有三。一不搬運可省軍力。二不畏火彈驚營。三遇祁寒酷暑。兵士居於板屋。不

致食宿於風雪烈日之中。不致吃虧。故精力較官軍必倍。鷄鴨魚肉更縱其啖嚼。華美衣服任其穿著。貧民驟得如是享用。故其氣自振。恒戰鬥以忘死。

寇盜雖如蛇蝎。未必別生肺腸。如黃巾之虐。猶知敬禮康成。不犯高密。保鄆公鄉。他如倉卒遇賊子。請代父弟。請代兄。彼此爭死者。賊輒嘉其義而釋之。史冊所載。不可枚舉。若夫身捍危城。力竭效死者。草竊之徒。亦知各爲其主。仍封恤之。如陳友諒糾合土賊陷安慶路。余闕死之。友諒且褒其忠。葬以大臣之禮。又如蘇武使匈奴。洪皓使金。義不屈節。俱得生還。蓋天理至性。自在人心。雖狂寇敵國。亦可感動也。若今之粵匪。則大不然。無論賢不肖。概謂之妖。悉屠殺焚擄。骨肉相救。呼號乞代者。兩殺之。凡陷一城。盡戕官吏。有自裁者。更鬻割之。暴骨於市。以故官軍克復之城。求殉難官吏遺骸。迄不可得。粵匪虐毒。一切舉動。皆自古叛逆所無。其不速滅無是理也。

逆匪迭陷雄都劇邑。被害文武。何可勝記。其忠魂最靈者有數人焉。甲寅二月。賊陷江寧。上元縣劉清溪。大令同纓。素負循良幹濟之名。城陷朝服坐大堂。厲聲罵賊。並誡賊勿傷百姓。賊衆

將劉令擁至城北。綁於樹。攢射之。更以鉅砲轟擊。瞬息骸骨崩散。百姓吞聲飲泣。莫敢踪跡。閱三日。有夜行後營者。見榛莽中有白光上騰。相約省視。股骸一隻。猶着靴未脫。其光自靴中出。百姓探之。得濺皮靴頁一件。內多文案草稿及官紳賢否可任何事等記。然不知爲何官之骸骨。最後得一手摺。列銜爲上元縣劉某係條陳六事欲上之大府者。於是始知爲劉令遺骨矣。羣弁之藏密室中。覓入木匣。以布包裹。潛埋於清涼山麓。不能封樹。暗爲標誌而已。然其地夜輒有光。謀葬之民。過墓而祝曰。光燄萬丈。忠魂結而不散也。固宜。然恐賊逃驚異。尋其處而掘之。轉不如韜光之爲愈也。祝畢。其光頓斂。有作詩輓之者。逃人不能全記。又癸丑九月賊陷黃州府。金菊仙太守雲門。知無兵無餉。萬不可守。作絕命詞二章。寄湖北撫院文巡捕張德堅。囑其爲代呈大府。投井死之。先一年太守于役浦圻。其夫人二女寓省垣。城陷。爭先投繯殉難。節義萃於一門。且太守起家牧令。夙有神君之目。其詩曰。笑赴清泉死。泉香骨亦香。滿腔餘熱血。泉下侍先皇。命婦投繯日。雙珠爭後先。泉臺貞烈魄。相待已經年。二詩感人也深。膾炙人口。賊求其屍不可得。遂踞府署。每晚二堂。必見紅光圓如鏡中。立一頤而髯者。口吐清水如散珠璣。

## 篡彙情賊

堂上幔帷皆濕。賊懼他徙。黃州難民多知之。此誠忠盡之氣充塞其間也。甲寅三月初十日。賊陷德安府。自總督以次文武俱逃避。獨署安陸萬令萬成出轎立府署大門外。賊至。拔佩刀指賊罵砍之。擊賊攢刺。身無完膚。吏剖腹實爆竹於其中。聚火轟焚。皮骨燔灼殆盡。賊踞一月。他竄。居民感其德政。憫其慘死。尋得殘骸零骨。泣而瘞之。旋示夢於生員徐鍾溷。通身作金色光。謂所檢頭骨非是。乞棄之。次日糾集紳民復爲開匣。其諸骨多黃金色。惟頭骨一具。髹骨一塊。焦黑不類。因剔出。改葬於漢黃香墓側。蓋生時嘗謁香慕歎流涕。願他日葬遺骸於此。庶幾忠孝相依。猶梁伯鸞之願埋要離塚旁。從其志也。衆賊圍武昌半年。前盡援絕。在事文武多知必不可守。然竭力捍衛。城陷存必死之見者。顯秩之中。究推署臬司李紅樵觀察。卿毅爲第一人。觀察平日宦績及守城勞瘁皆足生天。逮六月初二日。大東門啟。知事不可爲。豫約候補知縣俞恒淳同死。屆時不期而會。從容就義。縊於京館之後樓。從死更有微職數人。僕從一二人。賊目踞其室。每欲登樓。必有異香襲人。頃刻頭痛欲裂。遂封閉之。其長子鶴人廉訪孟羣自粵帶勇。由湖南剿賊至湖北。所向前驅。急公義。而復家仇。忠孝出於至性。誠一代偉人。八月二十

三日克復都省。不待城啟。縋縶而入。匍匐以尋父屍。至京館之樓。見蛆壳白骨分布樓板之上。獨其父之屍。面色如生。絲毫無損。椎泣歛以監司冠服。父老兵勇聚視如堵。莫不篤信忠骸確有鬼神保護。賀忠貞之盡節。墩子湖浮屍七十日鬚髮如故。可並傳矣。當酷暑灼金之時。遇見屍必殘之寇。非死者忠誠所結。生者至孝所格。安能若是哉。賊氛所至之處。異聞實多。恐傳聞失實。不敢率記。此則共知共見者。至於殉難忠魂。指不勝屈。何以獨此類數事具靈跡。蓋死同一死。求其心志或有不同。變出倉卒。雖欲求生。亦不可得。或述其生平。一死僅足晚蓋。在卹典固所必及。然鬼神鑒察。別具權衡。故不能人人皆示神異。至儒不言靈幻。此則章章在人耳目。並非故神其說也。

壬子十二月賊陷武昌。縉紳之家。闔戶自焚者。比比皆是。有張姓者。其次子以末職需次江南。其家二十一口皆焚死。所居成瓦礫場。癸丑二月。其子匍匐歸。撥灰燼尋屍。得焦黑殘骨十餘具。皆長不滿尺。不辨誰某。且不知是何肢體。泣而殮之。當泣涕之時。每骸骨一具皆流血數縷。拭之復出。殮者大慟幾絕。嘗聞惡死之屍。見親丁則七竅出血。死屍何知。氣機感觸。如此響應。

若殘碎燒燬之骨較之全屍更無靈氣。何一見骨肉段段流血不啻有知耶。逆賊荼毒生民。竟致天壤間見此異事。

癸丑賊自江西敗竄犯田家鎮。其時前武昌同知勞光泰造砲船甫畢。奉檄下剿。所招皆潮勇。船則笨大不如法。其子母砲過長。船上不能安頓。有識者皆知其必敗。光泰方得意。肆言謂賊不敢上竄。非不能破田家鎮。乃懼我砲船也。一經下行。立即驚散。不待戰而勝矣。江夏優廩生黃金吾。久事戎幕。素有胆識。殊不直之。上書誡其驕疎而詆其妄謬。光泰大怒。執而訊之。問難數千言。黃生終不爲屈。光泰借詞尋隙。斥辱之。黃生不平。具稟號訴於撫轅。撫軍是之。遂奏光泰不可恃諸狀。奏牘未返而事已不可收拾矣。廣勇多降賊。其遣散者皆爲匪。即今郴桂東安諸股是也。光泰迄未弋獲。喧傳亦在賊中。未必不然。甲寅六月再陷武昌。黃生候其母畢命。拜祭後亦自縊殉節。其人品之懸殊如此。光泰壬辰進士。久任牧令。素以才識自負。其人志大而疎。然亦不料債事流毒至於此極也。黃生上撫軍之稟猶能記其大概。於時事頗有關係。故擇錄之。其鈔黏上光泰書曰。司馬雖粵人。然離粵日久。不知目下情形。廣勇最不可靠。食口糧卽

爲勇。賊至卽爲賊。久之勇賊不分。而潮勇桀驁爲尤甚。生曾佐謝定侯太守幕。謝公雖非醇正人。然能知潮勇之爲害。故甘遠戍而不肯管帶。司馬所招廣勇。皆潮勇也。因其名目爲衆棄。不過略變其名云爾。請一二問之。有廣肇高廉等處人乎。然能以重賞餌之。猶可爲用。今餉絀賞薄。又焉足動其心哉。在潮勇之意。亦未必定欲從賊。今駕砲船至田鎮。勝則爲功。敗則駕船投賊。未有不重用者。况擄掠之奢富。必百倍於官糧。又何憚而不爲。司馬質質不察。猶欲仗鄉誼以籠絡維繫之。試思粵西潮勇滋事。所殺舊勇官如李春元等輩。非廣人耶。在司馬竭力效忠。視一死其甘如飴。然萬一僨事。其如大局何。其如國事何。廣勇萬不可用。迄無人敢言。生獨發難效忠於司馬者。不過爲蒼生計。雖廣勇恨而屠之勿避也。梁敬堂乃藩司一工房書辦耳。市井寡識。但知牟利。豈諳造船法。其尤可異者。始造之船。兩頭起翹。舵後開砲眼。駕駛尙靈活。嗣因人言桅帆過高。恐致翻覆。一律將船底改爲寬平。穩則穩矣。其如不能行駛何。夫桅高可去一二尺。不必波及船身也。治非其病。搔非癢處。反增他累。可勝歎哉。然此猶論船之式不善焉。若工料之不可問。侵蝕纍纍。草率偷減。則愈不忍言。徒以彩繪飾其陋薄。何司馬爲其蔽惑。

## 賊情彙纂

之甚耶。所鑄子母鐵礮長至八尺五寸。礮船能對安乎。鐵未熔鍊。造不如法。槽漏門鬆。接筭之處。走氣。施放必致後坐。內堂孔罅如毛。引門未能平底。種種舛錯。幾成廢物。以如是之船。載如是之礮。用如是之勇。禦如是之賊。謂可成功。雖斷生頭不敢言也。賊披猖至此。非全無伎倆者。望司馬察焉。生久欲上言。或謂司馬所辦諸事。聊備不虞已耳。賊在江西。未必卽至湖北。以此礮船虛聲警駭土匪。似尙有餘。故暫甘緘默。而不料賊衆卒至。大府別無豫備。專恃司馬一旅剿賊。文檄且下。行有日矣。聽聞之下。不禁汗涕齊出。甘冒斧鑕以陳詞者。冀司馬抑其驕氣。別圖補救也。其補救之法無他。惟有以潮勇守城。換楚勇出師。每船置一二潮勇。使教習演礮。以新造之船。選所造靈使稍堅固者。下剿。另催大擺江協助之。全將新鑄礮位棄之不用。挑向存屢試之礮。置之船上。大小有船四五十隻。礮七八十尊。足供此役已。俟到田鎮本城。所置之礮。仍可移用。在精不在多。不獨兵勇。卽船礮器械亦然也。更恃司馬精心默運。激勵將士。扼守田鎮。不必進取。而全楚已有磐石之安矣。前於巡捕房內。聞司馬之緒論。一則曰。廣勇義烈非常。千人如一心。再則曰。船堅礮利。賊見卽走。不致相持諸談。與生闇陋之見。天淵水火。夫人自信



太深。外人之言殊不易入。生非不知。不過代全楚生靈乞命。其心無他。伏乞茹鑒云云。其述光  
 泰問難之詞曰。初四日勞丞傳生過江。至其廨所。盛氣相凌。如鞠重囚。首指書中剿如是之賊  
 諸語爲難。曰爾訟棍狂生。安知軍旅。廣勇船礮之得力。非爾所知。不足深辨。爾說剿如是賊云  
 云。是極言賊匪利害也。粵寇殘暴無人理。所習邪教荒誕不經。一味凶頑毫無伎倆。此等毛賊  
 安能成事。又何足平定。古之僭竊。隗囂符堅石勒之徒。知所以倡亂。且知所以爲治。始足慮也。  
 爾肆言賊勢強盛。即屬悖逆。此等狂寇。唾罵之不暇。爾獨贊揚之。是誠何心。雖律以奸細殺之。  
 亦無不可。口筆雙刁之輩。今理屈詞窮。爾將何解。生屏氣聽畢其詞。徐徐對曰。生是否奸細無  
 左據。必憑公論。亦如司馬論船礮云云。可不深辨。至於賊之利害。誠生所說。何諱爲。試思劇賊  
 當前。嘗之何益。豈若小兒女唾罵之以取快一時耶。司馬非真知尊朝廷者。知尊朝廷者。莫生  
 若也。本朝治隆千古。聖聖相承。體國惠民。良法美意。無所不具。然而奉法之吏。似不盡賢。行陣  
 之士。亦不盡有勇知方。以致釀寇亂。至於粵匪。文字荒誕。術在惑人。其用兵詭變。似有隗囂符  
 堅輩所不及者。官軍屢挫。賊黨蔓延數省。寔由賊計捷速莫測。承平日久。宿將湮亡殆盡。我軍

一時乏才故也。一經天心轉移。必出偉人以滅此賊。所謂非常之績。必待非常之人耳。奸民倡亂。聖世所不能免。然殘破至此。猶必謂賊無伎倆。賊不足平。將欺人抑自欺耶。近來官吏將弁。皆喜聆粉飾捷音。惡聞真寔警報。比及賊至。逃避不遑。前之大言。威風何在。殊可恨也。不特此也。惟其賊黨利害。所以稽誅數載。此亦至情至理。若必謂賊黨爲隗囂賊等輩。所不若。不過張角孫恩之流輩。果如是。則是我文武并無張角孫恩諸人對手。豈不重貽朝廷不世之羞哉。假使竟有隗囂儕輩出。又將用何人才敵之。豈不又重朝廷當世之憂乎。總之。賊誠暴虐。賊誠利害。於暴虐則詈之。於利害則角智以圖之。若一味大言輕之。殊不可也。如賊係強敵偶挫。猶有詞可解。若賊果無能。是我文武之無能較賊豈不更甚耶。勞丞聽說復怒曰。爾又敢說復有隗囂輩出。此幸災思亂之詞。生復從容對曰。問答博辯。引他言以實之。此恒情也。司馬無詞。故入人罪。勞丞又曰。爾言廣勇通賊。豈亦疑我乎。我科目出身。受恩深重。今垂暮之年。捨身以効命者。亦不過欲挽回於萬一耳。爾何見逼之甚。生對曰。司馬循吏名士。生安敢疑。然恐廣勇降賊之後。司馬獨立爲可慮焉。勞丞乃厲聲曰。迂酸勿作假慈悲。吾老命繫此一行。爾何得阻撓。生

復規以改作補救諸語。勞丞愈怒。謂生不守臥碑。連呼家人強拉生跪。欲用官刑。生復對曰。我非告狀。又未得罪。何須戒飭之有。若責以出位言事。則又誤己。今狂寇壓境。猶守臥碑之戒。不爲百姓求生路。有是理乎。忍心乎。司馬果以老命博忠名。恐亦非正道。正在忿爭之時。其幕友出呼兩家人掖生以出。猶聞勞丞大言曰。吾必回兩院辦此狂徒。生平日素守繩墨。實因一時激於義憤。致受勞丞凌辱。其應辨與否。自憑憲斷。所陳之事。實係忠言。與省城大局關繫匪淺。乞大人精思而裁決之。或別委賢弁前赴田鎮。生雖受褫刑。亦甘心矣。稟甚冗長。大略已具。撫軍竟亦知嘉納。惜未能用其言。空談無補。一奏而已。黃生素醇謹。言如不出。勞丞之債事。悉如黃生所料。一書一稟。古誼若龜鑒。忠肝如鐵石。斯二語可以移贈。其氣節才思。皆不可及。至其扶掖而出。倔強之態。亦可想見。城陷盡節。可謂不負所學已。至其凌厲長官。肆言無忌。必其人常斯時斯事則可。若寡識者效之。則無理取鬧矣。因所言有關賊情。故附及之。

禮制

自古叛逆起於汗賤。必多所更張。以自銜。然從未有滅古荒今。背棄倫常。一味怪誕。妄冀脅此

安居良善之民爲彼困苦凶頑之黨者。而洪秀全楊秀清等雖極狡獪。亦知威力可刦一時。而不可強人以必服。特恃其私智。假託鬼神。以愚同類。立僞制律。以矜己能。故於千支六書時憲語言服飾。無不任意捏造。現踞江寧。侈營宮室。盛陳儀衛。恣情快意。似亦知來日無多。乘時自娛。以俟一朝之俘戮耳。所置僞簿書左右史等官。端主章奏。倡立科條。哀然成帙。其已梓刻之太平禮制一冊。僅載稱呼。毫無別義。餘皆從僞奏章中採輯。暨難民所述錯綜勘訂。編僞禮制爲一門。分僞宮室以下爲七則。一言一動。纖細無遺。庶犀照當前。魑魅應無遁影矣。

### 宮室

逆首洪秀全楊秀清等皆棲梧山僻凶徒。賤隸所居。無非葦門圭竇。所著則短褐草屨。日坐臥於蠻烟瘴雨之中。焉覩大廈廣居之盛。叛逆以來。屢爲我兵所窘。窮蹙奔竄。數瀕於死。每詭秘深藏。甚至一夜之中三移其居。卽如秀全所居之區。謂之天朝。亦屬虛設。其實不知避匿何處。雖被擄經年之人。亦不能指逆首所在。蓋初未嘗占踞城池。思我兵襲而捨之也。迨陷武昌省城後。始盛飾僞宮。僭越非分。及踞江寧。見宮室之富。器用之美。益侈然自得。癸丑四月。僞天王

洪秀全改兩江總督署爲僞天朝宮殿。毀行宮及寺觀。取其磚石木植。自督署直至西華門一帶。所壞官廨民居不可勝記。以廣基址。日驅男婦萬人併力興築。半載方成。窮極壯麗。以金陵文弱之人。逼令挑磚運土。稍不遂意。則鞭箠立下。婦孺慘遭凌虐。亘古罕聞。茹苦含冤。天地慘變。是以工甫成。即燬於火。詎蛇蝎之心。冥頑不靈。四年正月。復興土木。於原址重建僞宮。曰宮禁城。周圍十餘里。牆高數丈。內外兩重。外曰太陽城。內曰金龍城。殿曰金龍殿。苑曰後林苑。雕琢精巧。金碧輝煌。如大蘭若狀。惟外面純用黃色塗飾。向南開門曰天朝門。扇以黃緞裱糊。繪雙龍雙鳳。金漚獸環。五色繽紛。侈麗無匹。其宮殿堂廡下及廂。簷庖漏無不如是。且以黃綢十餘掛諸門外。硃筆大書字徑五丈。其文曰大小衆臣工。到此止行蹤。有詔方准進。否則雪雲中。賊呼刀曰雲中雪。忽作歇後語。言外必殺也。門之兩傍設東西朝房二所。內外各三層。亦皆寬敞高廣。門外用紅黃綢縐紮成彩棚。風雨任其淋漓。月餘即更換一次。門前丈餘開河一道。寬深二丈。謂之御溝。上橫三橋以通往來。過橋一里。砌大照壁。高數丈。寬十餘丈。照壁適中。搭造高臺。名曰天臺。爲洪逆十二月初十生日登臺謝天之所。臺傍數丈外建木牌樓二。左書天

子萬年。右書太平一統。牌樓外有下馬碑東西各一。此洪逆僞宮之大概也。僞東王楊秀清至江寧。初據藩臬署。因有金甲神到處呵叱。不獲安居。三日後移至內城將軍署。又以逼近東門。懼城外砲子飛入。復至旱西門黃泥岡。改前山東鹽運使何其興住宅爲僞府。盡拆毀附近民房圍圍。開拓地基。以竊奪之物料。威脅之人力。何所顧惜。窮極工巧。聘心悅目。以耀同儔。百姓震驚。以爲尊嚴無比。雖遜於洪逆僞宮。然已廻環數里。垣高數仞。更以碎磁鋒密佈牆頂。擁以油灰。防人攀越以謀已。大門亦糊黃緞。屏用銅環。彩畫則止一龍一鳳。彩棚仍以紅黃綢縐爲之。東西設僞官廳各一。東曰承宣廳。西曰參護廳。並有東西殿尙書掛號所。此楊逆僞府之規模也。其僞西王蕭朝貴僞南王馮雲山久經殄滅。今仍列其僞銜。逆屬亦有僞府。奢侈暴殄。大略相同。僞北王韋昌輝初至江寧。據富室李姓家。嗣移中正街前湖北巡撫伍長華新宅。僞翼王石達開先據故明張侯第。嗣住上江考棚。僞燕王秦日綱中正街昇平橋前湖北宜昌府程家督宅。除洪逆外。所居皆謂之僞府。僞西王府門畫一龍一鳳。與東王同。他如南北翼及燕豫五僞王則畫一龍一虎。國伯國宗及各僞侯亦畫一龍一虎。而所據之館則又謂之衙。丞相畫象。

檢點指揮至總制俱畫鹿。監軍下至兩司馬則畫豹。但監軍軍師畫豹踏雲。師帥至兩司馬雖亦畫豹。則踏山岡。丞相至軍帥公堂畫龍。師帥至兩司馬公堂一概畫虎。其僞侯丞相以下分據文武衙署並縉紳富室房屋殆盡。無不大張旗鼓。粘貼僞銜。互相誇勝。而窮奢極欲。惟洪楊兩逆首爲最。餘皆不逮矣。改妙相菴爲僞天朝花園。改惜陰書屋爲僞東王別業。獨古林菴隨園。楊秀清周覽以爲朽壞棄之不用。凡宮殿服飾等差。必由楊賊奏取僞旨方興工製造。初賊陷雄郡省會。必以官廨巨第據爲僞府。如洪逆所居則用立匾。黃紙硃字。大書曰天朝門。楊賊曰東王府。丞相以下別用黃紙封條曰天官正丞相某姓館。下至兩司馬皆然。僞王府必用黃紙糊門。上畫龍鳳。惟幔桌圍皆用黃綢繡龍鳳。後至江寧。則以黃緞糊門。蓋地方瘠苦。購買不出。雖幃幔亦用黃紙。總之賊暴殄天物。有則儘有。無亦遷就。爲綢爲紙不同。然尙用黃色則一也。若僞王侯對聯皆黃綾。或黃紙朱書。僞檢點以下則黃紙墨字。語皆狂悖。其對句另詳賊文書條內。

僞印

賊衆皆鄉愚市僧。多不識字。安知篆文。故所刻僞印皆宋字正書。四面刻陽文雲龍邊。正中一行另鑿一線邊。刻僞官銜於其中。並無印信關防字樣。僞王皆金印。八寸見方。四面雲龍。中空一行。刻太平天王大道君王全九字。左首角上鑿一金字。右首角上鑿一璽字。并改璽。左首邊上刻奉天誅妖四字。左首邊上刻斬邪留正四字。然非緊要詔旨不用此印。另有三寸六分見方一印。四面龍文。中刻旨准二字。凡批答僞奏章及各僞書皆鈐之。僞東王僞西王印長六寸六分。闊三寸三分。雲龍邊。如楊秀清印。中一行。刻太平天國四字。下忽雙行。以勸慰師聖神風。禾乃師爲一行。贖病主左輔正軍師東正爲一行。下接楊秀清三字居中。蕭逆印僞銜亦雙行並列。僞南王僞北王印字則單行居中。僞燕王豫王印僞侯印字皆單行。然必繫以姓名。如太平天國燕王秦日綱。太平天國真忠報國佐天侯陳承塔之類。僞東王至僞燕王印長各遞減二分。闊遞減一分。僞侯印長減四分。長闊二分。僞王侯印。凡筆畫粗肥之處。皆中空如飛白體。僞侯僞天官正丞相銀印。以下皆木印。僞丞相印長五分。闊二寸五分。以次至兩司馬。每降一等減長二分半。其闊皆對折。如僞指揮印長四寸五分。闊二寸二分半是也。凡金銀印其質皆



極薄。金印則金匣金匙鑰。銀印則銀匣銀匙鑰。自丞相至兩司馬印中一行但刻僞銜。不繫姓名。僞銜甚多。各舉一以概其餘。如僞丞相則刻太平天國天官正丞相。各僞銜皆首綴太平天國四字。并改國爲國。凡僞印皆同。後不複叙。僞檢點則刻殿左殿右幾檢點。指揮則刻殿左殿右幾指揮。將軍則刻炎一正將軍。總制則刻金一總制。監軍則刻木正一甲一監軍。軍帥則刻中一軍帥。師帥則印一中營師帥。旅帥則印前一軍前營前旅帥。卒長則刻前一軍前僞營前一卒長。兩司馬則刻前一軍前營前前一東兩司馬。其餘雜職及各典官職同何官。印之長闊卽同何官。僞典官極多。已詳僞官制門內。如某軍正典聖糧某軍副典硝之類。各僞印皆印刻僞銜。別無暗記。僞官卑者多有正副。正副亦皆有印。僞天王印龍鳳雙紐。僞五印龍紐。侯印象紐。僞丞相印麟紐。皆有人見過。丞相以下亦分獅豹熊虎諸紐爲等差。曾見僞奏章議定。然非木印至今並未刻紐。並無直紐。僞國宗提督軍務印僅用銀包而已。賊中制度。標新立異。朝更夕改。繁冗太甚。故羣下亦不甚遵。溯立僞印之初。皆江湖星卜者流爲之創置。其式如神牌。如羽十疏文標簽現醜已極。尤不值一笑也。

註僞印式及分寸皆攷自僞文告餘俱程奉璜說與賊情集要所載衆說同

僞印長闊分寸

僞天王印見方八寸 又旨准印見方三寸六分

東西王印長六寸六分闊三寸三分

南北王印長六寸四分闊三寸二分

翼王印長六寸二分闊三寸一分

燕豫王印長六寸闊三寸

侯印長五寸六分闊二寸八分

丞相印長五寸闊二寸五分 國宗提督軍務印分寸如之然不常置

檢點印長四寸七分闊二寸三分七釐半

指揮印長四寸五分闊二寸二分半

將軍印長四寸二分半闊二寸一分二釐半

賊情彙纂

纂彙情賊

總制印長四寸闊二寸

監軍印長三寸七分半闊一寸八分七厘半

軍帥印長三寸五分闊一寸七分半

師帥印長三寸二分半闊一寸六分二厘半

旅帥印長三寸闊一寸五分

卒長印長二寸七分半闊一寸三分七厘半

兩司馬印長二寸五分闊一寸二分半

僞王妃印長二寸闊一寸另繪式於僞文告門

同職官鄉官印之長闊同正職

僞時憲書

行夏之時。聖人之訓。夫寒暑往來。日月盈虧。剝食及七政四知。周天行度。以人測天。不容毫釐之謬。嗚呼。曆法尙矣。前明每患推步訛誤。改延西洋人入欽天監教習。我朝治隆萬古。仁廟天

竄聰明。御製數理精蘊一書。集時憲之大成。永爲萬世萬國之法。雖西域四疆。南徼蠻長。無不共奉正朔。蠢爾狂寇。竟至更張時憲。此尤黃巾赤眉所不爲。黃巢闖獻所不敢也。測其初心。亦不過錯亂日月以惑我軍。爲我探知該逆傳令何日圍攻何處。預爲防堵。其實彼中日期不同。或先或後。卽此可以誤我耳。逮賊氛日熾。遂恬不爲怪。居然定僞時憲書。頒行賊境。其僞書之式已著於左。以三百六十六日爲一歲。單月三十一日。雙月三十日。以立春等等六節氣定爲十六日。餘俱十五日。因無閏月。其意欲分兩次閏餘之六十日。勻散於五年之內。殊不知推移伸縮已於現行時憲書錯亂至十餘日。其寒暑不驗可知。尤可異者。我之初五日卽賊中十五日。試思初五日尙未弦。安能圓滿。賊輩動以尊天爲名。如是行爲。直欲強天道而就其僞法。逆天瀆天。罪大惡極。豈區區禮拜諷誦所能追乎。是賊之悖爲亘古所無。而其愚亦亘古所未見也。又如大撓作甲子。亦萬世不易之制。賊妄改支干。以丑爲好。以卯爲榮。以亥爲開。復改鬼宿爲魁宿。此則賊中忌諱變易文字甚多。別無用意。另詳僞文案內。

僞時憲書式

前導副軍師南王  
馮禾乃贖病主

大平天國右弼

左輔正軍師東王楊  
右正軍師西王蕭

後護右副軍師北王韋  
暨左軍主將翼王石

伏奏

真主我兄天王萬歲萬歲萬萬歲爲治歷定時事當今

天父皇上主皇上帝開大恩差我

主降凡爲

太平真主是

大平日平勻圓滿無一些虧缺也故臣等造歷以三百六十六日爲一年單月三十一日雙  
月三十日立春菁明芒種立秋寒露大雪俱十六日餘十五日我

天朝天國永遠江山萬萬年無有窮盡乃是

天父皇上主上帝差遣我

主降凡意旨也其餘從前歷書一切邪說歪例皆是妖魔施計迷陷世人臣等盡行刪除  
蓋年月日時皆是

天父排定年年是吉是良日日時時亦總是吉是良何有好歹何用測擇凡大衆皆真心虔敬  
天父上主皇帝有天眷顧隨時行事皆大吉大昌也今臣等造歷既成謹獻我

主萬歲萬歲萬萬歲作主頒行御批准

奉

旨造甲寅四年新歷頒行天下

正月建 丙寅參宿

初一戊申虛立春禮拜

初二己酉危

初三庚戌寶

初四開辛危

初五壬子奎

初六癸好箕

初七甲寅胃

初八乙榮昴禮拜

賊情彙纂

初九丙辰畢

初十丁巳齋

十一戊午參

十二巳未井

十三庚申魁

十四辛酉柳

十五壬戌星禮拜

十六癸開張

十七甲子翼雨水

十八乙好軫

十九丙寅角

二十十榮亢

二十一戊辰辰

二十二己巳房禮拜

二十三庚午心

二十四辛未尾

二十五壬申箕

二十六癸酉斗

二十七甲戌牛

二十八己開女

二十九丙子虛禮拜

三十丁好危

三十一戊寅寶

以次各月之式皆同。僞時憲書至簡。祇載數目。無日字。無一切宜忌吉凶神煞字樣。以甲子推

之。乙卯年正月二十一日乙酉乃賊中二月初一日也。

### 僞朝儀

逆賊無參拜揖讓之儀。凡打躬叩首。皆呼爲妖禮。雖洪逆禮拜敬天父。羣下朝洪逆。亦止長跪。其餘僞官互見平行。并無禮節。官降一等。卑者跪白事。尊者坐受之。跪後仍雜坐諧謔。尊者自外入。卑者但起立讓坐。奉茶而已。賊知粗鄙人繩以禮法則手足無措。故簡略之使其易知易從耳。初至江甯。楊賊日朝洪逆所。近則洪楊諸賊深居不出。妄擬垂拱而治。必有大喜慶事方設朝會。如楊賊有事要見。亦必請僞旨批定日時。大抵午未時居多。屆時楊賊率各僞官畢集。輿馬填塞街市。僞天朝門洞開。大門外立僞引讚官。傳呼各官進。惟楊韋石秦各劇賊得進見。雖寵任如僞佐天侯亦不得望見顏色。僞侯以次俱排列於大門內。引讚官呼跪。則皆跪。左右史跪於階下。侍臣遞茶。僞通讚官呼曰。天王有旨。詔衆官員珠貫而入。各肅班聯。趨墮起跪。不得囂喧。三呼萬歲。聽旨傳宣。朝覲已畢。站立兩邊。讀訖則衆僞官如儀起立。少頃。楊賊白事畢。出則轉身向內而立。各僞官皆跪。其後又呼萬歲者三。然後掩門而散。他如生子彌月等喜事。



楊逆具奏請朝覲。洪逆每批勸理天事便是朝見也。尋常禮拜日。羣下惟具本請安而已。楊韋石各僞王亦自有受賀之儀。楊賊則自韋石以下皆朝之。餘僞王惟本府屬官朝之。然亦不常見。一切軍務皆由楊賊主裁。僅東殿尙書侯謙芳李壽春等一二人與之計議。凡有令則交佐天侯傳。傳至檢點林錫保胡海隆處。各僞官曰至檢點衙聽令。雖天侯等有時燕見。一月之間亦不過二三次。其一切文書每不能面白。故織芥之事。必具稟奏。層層轉達。以取僞旨。賊多市井無賴。識字不多。厭見文字。悉任掌書裁處。於是則多設簿書諸僞官。而被脅充先生者似可漸操其柄也。夫首逆數人起自草莽結盟。寢食必俱。情同骨肉。且有事聚商於一室。得計便行。機警迅速。故能成燎原之勢。今踞江寧。爲繁華所惑。養尊處優。專務於聲色貨利。往之倚爲心腹股肱者。今乃彼此睽隔。猜忌日生。禁令則徒立苛條。軍務則全憑文告。氣脈不通。已成麻痺不仁之象。賊之滅亡。可燭照而數計矣。

服飾

賊由粵西至長沙。向皆布衣藍縷。縫數寸黃布於衣襟以爲記號。囚首垢面。鶉衣百結者。比比

皆是。即首逆洪秀全、楊秀清等亦止紅袍紅風帽而已。打仗則短衣赤足。取其登涉輕便。故擄來之人。無論士農工商。必先褫其衣冠履襪。惟以包巾分別新舊與尊卑。兵及新虜之人皆紫紅巾。僞官與老髮賊則包黃巾。旅帥以下黃布巾。以上黃綢巾。官大一級。拖長一寸。百姓男女概令包藍布巾。逮陷武漢。繁華之區。錦綉山積。遂逐戶搜刮。取得鮮衣華服。貂榆狐裘。雖覺華麗可喜。然多不能辨識。於是有裂婦女紅藍裙褲以當帕首者。折金綉挽袖以當繫腰者。有賊婦而着男子馬褂。穿厚底鑲鞋者。有男賊而着婦人闊袖皮袄者。更有以雜色織錦被面及西洋印領單裹其首者。青黃紅綠。錯雜紛披。醜惡之態。難以言喻。虜得貂狐綢緞。長衣必齊腰剪斷。改作窄袖小襟短袄。或改對襟坎肩。以數尺紅綠綢縐纏於腰際。帶頭拖至足跟。若珠毛灰鼠之衣。則着諸帖體。海龍紫貂之袖。則用以抹桌。粵西女子雙足如漆。多有不着鞋襪。不着裙者。插戴滿頭珠翠。壓首難勝。披裹數重綾絹。懷挾纍纍金銀。形同孕腹。擄得幼童貌美者。僞官得之謂之公子。衆賊得之謂之老弟。周身皆着花綉。以抄得香珠玉佩手鐲指環及荷囊扇袋之類。懸帶於腰項襟袖之間。行動則金玉撞擊。鏗鏘有聲。且使之顛狂跳躑。以爲笑樂。時當

雪後泥濘。以被褥帳幔之屬鋪墊通衢。其單夾紗羅衣裳。一時無用。則各僞府用以鋪地。往來踐踏。略不顧惜。至鞋帽領袖。並剪臙半截衣及一切銅錫磁器。隨處拋棄。填塞溝池。巷道皆滿。其時僞職尙少。惟以風帽分別職級。無職老賊並無風帽。僞王親戚戴全紅風帽。其餘僞官皆紅風帽。以黃邊寬狹定官職之大小。另用白綾一小塊。或寫或綉。揭其官銜。如正將軍或副將軍三字。標於帽額正中。賊目風帽遂改用全黃。如洪楊各僞王賊。戴綉龍黃風帽於內。上戴龍鳳金冠。全擄戲班行頭以爲僞服。如黃色龍袍龍帽則僞王分用。紅袍紫袍金盔則丞相以下。自分等次攫取。蓋彼時尙無金繡諸匠作爲之執役也。由武昌下竄船隻。多載婦女。羣賊皆各携刀械陸行。始愛衣飾華美。儻數背負。旣而力不能勝。則沿途拋擲。久之身着重裘。過燠汗出力綿。舉前截改之短衣。一并擦棄。賊過之後。衣衫被褥。狼藉原野。如此暴殄。實曠古所無。迨至江寧。乃錦綉緞疋出產之區。其繁華更勝於湖北。賊於是又變易其服飾。更張其僞制。平時戴風帽者謂之功勳。加一等。又自金田起至永安州止相從之賊。不拘有官無官。俱謂之功勳。准着黃馬褂。朝帽額中寫功勳二字。職同僞總制。永安州至岳州相從者。自將軍以上至師帥皆

紅袍紅馬褂。以上則紅袍黃馬褂。有功小官。亦有賞黃馬褂者。凡穿袍有喜慶朝會大事。則戴盔。名之曰角帽。故有典角帽銜。其僞王等角帽又名金冠。僞官角帽又名朝帽。自洪逆以上金冠。皆以紙骨爲之。雕鏤龍鳳。粘貼金箔。即戲班盔貫也。洪逆冠如圓規紗帽式。上綴雙鳳雙鳳。鳳嘴左右向下銜穿珠三。黃綏二挂。冠後翹立金翅二。冠前立花繡冠額。一如扇面式。亦繡雙龍雙鳳。上繡滿天星斗。下繡一統山河。中留空格。鑿金爲天王二字。楊逆朝帽如古制兜鍪式。左右各一龍。其中近上立一鳳。盔頂豎一纓槍。四圍皆珠寶璣珞。冠額則繡雙龍單鳳。中列金字僞銜。韋石兩逆之冠如楊逆式。但上改纓槍爲小黃繖蓋。周圍拖排綏珠珞。韋逆帽額亦繡雙龍單鳳。中綴僞銜。石逆帽額則一邊繡一蜺。上繡雙鳳。中列僞銜。楊逆單鳳棲於雲中。韋逆單鳳棲於山岡。石逆單鳳棲於牡丹花上。此僞王金冠朝帽之制也。僞國宗朝帽同各僞王式。如韋姓則從韋逆之制。但額字則標明某伯某國兄。僞侯僞丞相朝帽如無翅正方紗帽式。亦係純骨貼金。上綴雙龍單鳳。龍頭向下。亦銜貫珠。黃綏二挂。帽頭繡百蝶穿雲。中列僞銜。自僞檢點至僞兩司馬朝帽。皆獸頭兜鍪式。如檢點指押兜鍪。上綴一獅。左右各綴一龍。中綴一鳳。

帽額繡百蝶穿花。中列僞銜金字。至檢點上。指揮以下僞官銜繡紅字。將軍總制朝帽同上式。但去單鳳。祇蟠雙龍。冠頂綴一麒麟。帽額繡百蝠穿雲。中繡僞銜。監軍軍師朝冠同上式。冠頂綴一虎。帽額繡百蝠穿花。中繡僞銜。師帥朝帽同上式。但龍去一爪。冠頂綴一豹。帽額繡雲彩。自師帥以下皆綉黑字銜。旅帥朝帽同上式。但去雙龍。冠頂綴一熊。帽額繡牡丹。中繡僞銜。卒長朝帽同上式。冠頂綴一彪。帽額繡荷花。中繡僞銜。兩司馬朝帽同上式。冠頂綴一犀牛。帽額繡菊花。中繡僞銜。凡有功勳平湖監試諸字樣。亦標於帽額之上。帽上之龍又以節數分等差。僞王九節。侯相七節。檢點指揮將軍五節。總制監軍軍帥三節。此僞官朝帽之制也。其秋冬平常所戴風帽。以角帽上所有之物皆綉於風帽上。如洪逆風帽繡雙龍雙鳳。一統山河。滿天星斗。僞丞相綉雙龍一鳳。餘可類推。帽額悉如角帽之額。花綉遞分等差。亦列僞銜。僞王則全黃風帽。僞侯至兩僞司馬皆紅風帽黃邊。兩司馬風帽鑲一寸黃邊。官大一級黃邊加寬二分。加至僞侯黃邊寬至三寸二分。其中又分花素綉絨。自兩司馬上至師帥素黃綉邊。自軍帥上至將軍花綉黃邊。自指揮上至僞侯則用黃絨綉成。黃深淺相間。如水紋然。夏日則別有涼帽。自

## 賊情彙纂

僞王至兩司馬帽胎皆同毘盧帽式而稍狹。四方圍帽沿如蓮花瓣。帽頂四面挖空如意雲頭。帽上龍鳳獅虎則以角上所有之物悉移置涼帽之上。後綴一長柄五彩圓光。下綴黃綬綠綬。拖出冠外五六寸。通體皆薄竹片編紮。以五彩紗綳糊成者。若於昏夜置一燭於其中。儼然揚州之包燈也。至僞服僅黃龍袍紅袍紅黃馬褂而已。其袍式如無袖。蓋窄袖一異圓袍。洪逆黃緞袍綉龍九條。揚逆綉龍八條。韋逆綉龍七條。石逆綉六條。秦胡二賊綉龍五條。僞國宗綉龍從各僞王制。僞侯僞丞相綉龍四條。僞檢點素黃袍。僞指揮至僞司馬皆素紅袍。其等差則於黃紅馬褂內分別。洪逆黃馬褂綉八團龍。正中一團綉雙龍。合九龍之數。楊逆綉八團龍。韋石秦胡四賊皆綉四團龍。自僞侯至僞指揮皆綉兩團龍。自洪逆至指揮皆於前面正中一團綉僞銜於其中。僞將軍至僞監軍黃馬褂前後綉牡丹二團。僞軍帥至僞旅帥紅馬褂前後綉牡丹二團。俱綉僞銜於前面團內。僞卒長兩司馬紅馬褂不綉花。前後刷印二團。書僞銜於團內。其僞銜之字亦分金字紅字黑字。如帽之制。皆由各典袍銜綉錦銜製造。此僞服之制也。賊之初呼驍爲妖服。只准着鞋。近立典金驍銜。製黃紅緞驍。亦有定制。驍皆方頭。洪楊韋三逆皆黃

緞繡金龍。洪逆每隻繡九條。楊逆每隻七條。韋逆綉每隻綉五條。石秦胡三賊素黃鞵。僞侯至僞指揮素紅鞵。僞將軍以下皆皂鞵。其女官冠服如男制。然未見有戴角帽涼帽者。冬月則戴風帽。夏月則戴綉花紗羅圍帽。如草帽形。空其頂。露髮髻於外。或亦有定制未考。女官尊者則金玉條脫兩臂多至十數副。頭上珠翠堆集。官漸卑則金翠珠玉亦漸少矣。大抵僞冠服初皆攫自戲班。既則任意造作。前次攻克岳州。獲綉龍黃袍黃馬褂綉承宣二字。團龍黃馬褂及織金團龍黃馬褂鑿金爲字蟠龍金冠多件。製尤侈僭。蓋賊中金銀玉帛皆自擄劫而來。毫無顧惜。任意標新立異。窮工極巧。彼則欣欣自得。以爲尊貴無比。殊不知詭製褻色。俗惡不堪。真所謂槐國衣冠也。長髮老賊用五彩絲絨編成條子若續命縷然。緊扎髮根。後將髮挽髻。以所餘之縷盤於髻上。僞制將軍以下不得用五彩。只用紅綠繩編挽。其無職羣賊短髮者打紅辮線。髮長過尺或挽髻。貫以婦女銀簪。並有紫綢巾及披髮者。打仗必穿號衣戴竹盔。着平頭薄底紅鞋。老賊與有官者穿紅黃小襖。着黃鞋。而不着號衣。夏日多以擄來男女綢緞衣裙改爲窄袖衫寬腳褲。僞官老賊穿紅黃衫。其餘白色不穿外。就原衣襖色。或爲短衫。或爲坎肩。其衫

## 篡彙情賊

褲尤尙黑色。幼童或有穿紅藍褲者。擄來書寫人統稱先生。准穿長衫。着鞋襪。小館紫黑綢包巾。大館紫黃包巾。無腰牌號褂。賊中禁令。雖極熱夜臥不准光身。白晝不得裸上體。犯則枷打。賊目所用畫龍宮扇。柄長三尺。每以幼童環扇之。出則列於馬前。並以黃紅緞或金字壽帳。改爲短柄手織。謂之洋織。僞王侯則黃緞而綉金龍。其次亦有五彩畫者。賤者則以印花洋布爲之。每出必挾於肘下。亦有戴草帽而用花邊鑲沿者。賊黨多半脅從。賊目防人私積。卽所以防逃。故立法甚嚴。檢點以上方准帶金條脫。其餘惟准帶銀鐲銀指環。然銀鐲分兩亦有輕重。如軍帥以下不得過五兩。旅帥以下不得過四兩。不准私藏絲毫金銀以及剃刀。倘或搜出。謂欲變妖。輕則捶楚。重必斬首。所得首飾金珠不准昧匿。必令層層進獻。歸之僞王聖庫而後已。至於所定僞制。奢侈已極。一冠袍可抵中人之產。其僞王侯則擄掠之貲富厚。何事不辦。下逮各散職僞官各軍旅帥卒長兩司馬等輩。既賤且窮。安能有力製此。且其制屢定屢更。又安能製而復易。似賊之侍從及有執掌者。或從其制。餘多赭衣若囚。雖任僞官。並不能一服僞官冠服也。更有外出虜糧之僞職。僅總制竟僭用檢點冠服。務精其製以鳴得意。亦有被脅爲僞官者。



雖尊至指揮。仍敝衣粗服。視僞冠服如桎梏。此則天良不泯。人禽之分。逃出難民默識之。出以語人。恒歎歎不置焉。

### 僞儀衛輿馬

賊踞永安彈丸之地。重兵圍攻數月。窮蹙竄逃。募越山險。奔走於榛莽陵谷之間。自携軍火。裹糧以行。無舟車之載。安能覓輜馬。洪楊諸首逆亦自敝衣草履。徒步相從。偶至鄉村。擄得民夫。或以竹椅舁之。已屬至幸。迨後由長沙下竄。盡擄大江船隻。多得綢絹。恣意製造。旌旗炫耀。凶餓漸張。旋陷武漢。以武昌省會。漢口鉅鎮。百貨匠作。舟車輜馬。無所不具。賊始創設鹵簿儀仗。其下僞官女官亦擄得騾馬。遊行街市。然皆攬轡抱鞍。以足蹠置鐙外。使人牽馬緩行。惶惶恐墜。羣下擄得各公廨綠藍圍轎。獻之僞王。多製黃綢畫龍鳳旗幟。用五色鑲邊。以分別東西南北。每出不過銅鈺三五對。綉龍黃織一擎。鼓樂兩班。護圍數十人而已。既陷江甯。則侈然自得。踵事增華。設典天輿典天馬僞職。其東西南北翼各僞王亦各署此職。專司其事。並迭次議奏。於儀衛分別等差。凡僞王皆黃緞轎綉龍雲。侯丞相檢點指揮皆緞轎綉彩龍雲鳳。以龍鳳

之多寡分尊卑將軍總制監軍皆綠轎。軍帥師帥旅帥藍轎。百長兩司馬皆黑轎。亦定有綉虎綉鹿之制。然未曾用。僞天王昇夫六十四人。僞東王昇夫四十八人。以次遞減至兩司馬昇夫四人而止。洪逆從未出行。惟楊逆每出必盛陳儀仗。開路用龍燈一條。計三十六節。以鉦鼓隨之。其次則綠邊黃心金字銜牌二十對。其次則銅鉦十六對。用人肩挑。後飄數尺黃旗。墨書金鑼二字。其次綠邊黃心綉龍長方旗二十對。其次同上色綉正方旗二十對。其次同上色綉蜈蚣旗二十對。高照提燈各二十對。雖白晝亦用之。其次畫龍黃遮陽二十對。提爐二十對。黃龍纛二十柄。參護背令旗騎對馬約數十對。最後執械護衛數十人。綉龍黃蓋一柄。黃轎二乘。楊賊乘坐或前或後。蓋仿古副車之義。恐人之伺已也。轎後黃纛十餘桿。騎馬執大刀者數十人。更用鼓吹音樂數班。與儀從相間。轎後亦用龍燈鉦鼓。凡執事人皆上黃下綠號衣。至於執蓋執旗多用僞官。皆作僞公服。每一出僞府。役使千數百人。如賽會狀。以銜駭愚民。以爲尊貴無比。若天神然。然奢縱不倫。至於此極。似古之叛逆亦未必盡如是也。僞北王以下雖乘黃紅轎。一切儀衛。較之楊賊不逮十分之一。其餘丞相檢點等官。無非銅鉦兩對黃蓋一二柄而已。惟

輿馬前所張之蓋。用人執持。不時旋轉。若演劇中張蓋式。其僞東王妃出行無龍燈。一切執事較簡。惟多護衛。穿黃紅衣女官耳。悍賊不樂乘輜。散秩卑小之官亦愛乘馬。其鞭韁雖無定制。亦僞王侯始用黃色。下不敢僭焉。各僞官爭奇鬪富。盛飾鞍轡。擄得花綉帳幔被面。任意改造。惟帶串鈴則有等差。指揮以上雙串鈴。一繫馬頸。一綴馬臀。將軍總制監軍單串鈴。軍師以下不准帶串鈴。然在外擄掠之賊。人人僭用。羣醜連鑣而過。一片鈴聲。依然響馬行徑也。

僞稱呼

父子夫婦。人之大倫。賊逆天背理。不知長幼尊卑之序。安知有兄弟。是其所謂兄弟者。不准自兄其兄。自弟其弟。並欲強一切而兄弟之。於是有老兄弟新兄弟之稱。強婦女而姊妹之。有老姊妹新姊妹之呼。至其起事首逆。皆拜會結盟之黨。不以少長排行。而以入會先後分次第。如僞王侯呼洪逆爲二兄。楊逆爲四兄之類。其次則以有功勳有科炭爲最老兄弟。下此皆由新入老。是老賊有盡。而新新不已之無盡爲可慨也。即如全家被擄。則必使祖孫父子齊一而兄弟之。姑嫜妯娌齊一而姊妹之。及至同胞兄弟數人。則反東西互調分處之。是舍親親而強仇

## 篡彙情賊

仇以爲兄弟者。群下稱洪秀全爲天王。三呼萬歲。及各僞王王官女官公子枝枝節節皆改易稱呼。詳後所鈔僞太平禮制原本不贅。然撫拾煩瑣。群賊多不遵奉。如丞相下至兩司馬僞制。雖有分別。而賊中皆呼大人。各僞官之子皆呼公子之類。亦有尋常稱謂與其制不同者。如兩司馬或呼管長。卒長或呼百長。女管之長。亦稱管長。各賊所帶幼童。均稱老弟。貴者稱小大人。群賊能打仗者謂之牌。老幼服役之人謂之牌尾。是賊雖妄標色目。謬分等差。究屬刦賊之暗號隱語。並無所謂意義也。他如能寫字者概稱先生。貿易人及百姓概稱外小。婦女曰外小婆。呼我顯官爲大妖頭。卑官曰小妖頭。兵曰妖頭。勇曰妖勇。以及妖婆妖崽妖團幫妖跟妖諸名色。賊本妖孽。如我文告中輒曰迅掃妖氛。果何謂乎。

僞太平禮制稱呼原本全錄

王世子臣下呼稱幼主萬歲

第三子臣下呼稱王三殿下千歲

第四子臣下呼稱王四殿下千歲

第五子臣下呼稱王五殿下千歲

以下第六子百子至千子做此類推

王長女臣下呼稱天長金

第二女臣下呼稱天二金

第三女臣下呼稱天三金

第四女臣下呼稱天四金

以第五女至百女千女做此類推

東世子臣下呼稱東嗣君千歲

第二子臣下呼稱東二殿下萬福

第三子臣下呼稱東三殿下萬福

以下第四子至百子千子做此類推

東長女臣下呼稱東長金

賊情彙纂

第二女臣下呼稱東二金

第三女臣下呼稱東三金

以下第四女至百女千女倣此類推

西世子臣下呼稱西嗣君千歲

第二子臣下呼稱西三殿下萬福

第三子臣下呼稱西二殿下萬福

以下第四子至百子千子倣此類推

西長女臣下呼稱西長金

第二女臣下呼稱西二金

第三女臣下呼稱西三金

以下第四女至百女千女倣此類推

南世子呼稱南嗣君千歲

賊情彙纂

北世子呼稱北嗣君千歲

翼世子稱呼翼嗣君千歲

南女呼稱南金

北女呼稱北金

翼女呼稱翼金

皆與東西一式

丞相至軍帥皆稱大人如丞相則稱丞相大人檢點稱檢點大人以下類推

師帥兩司馬皆稱善人如師帥則稱師帥善人旅帥則稱旅帥善人以下類推

丞相子至軍師子皆稱公子但同稱公子亦有差別如丞相子稱丞相公子檢點子稱檢點公

子指揮子稱指揮公子將軍子稱將公子侍臣子稱侍公子侍衛子稱衛公子總制子稱總

公子以下類推

師帥子至兩司馬子皆稱將子但同稱將子亦有些別如師帥子稱師將子旅帥子稱旅將子

以下類推

丞相女至軍帥女皆稱玉但同稱玉亦有些別如丞相女稱丞玉檢點女稱檢玉以下類推

師帥女至兩司馬女皆稱雪但同稱雪亦有些別如師帥女稱師雪旅帥女稱旅雪以下類推

王世子及東西南北翼各世子皆是管理世間者也均稱世子

宮城女及東西南北翼各女皆是貴如金者也故均稱金金貴也色美而不變者也

丞相至軍帥皆是公義之人故均稱其子曰公子又皆是虔潔之人故均稱其女曰玉玉潔也

色潤而可寶者也

師帥至兩司馬皆是典兵之人故均稱其子曰將子又皆是清淨之人故均稱其女曰雪雪清

也色白而可愛者也

女丞相女檢點女指揮女將軍皆稱貞人婦人以貞節爲貴者也

軍帥妻呼稱貴娘丞相妻呼稱貴嬪檢點妻呼稱貴嬪指揮妻呼稱貴姬將軍妻呼稱貴嬌

欽命總制妻呼稱貴媼監軍妻呼稱貴奶軍帥妻呼稱貴嫺



師帥妻呼稱貴嫺旅帥妻呼稱貴媵卒長妻呼稱貴妯兩司馬妻呼稱貴媵丞相妻至軍帥妻加稱真人師帥妻至兩司馬妻加稱夫人

朕仁發兄仁達兄稱國兄嫂稱國嫂慶善伯纘奎伯元玠伯輩稱國伯慶軒紹衍叔輩一體同稱國叔仁正兄仁賓稱國宗兄元清輔清四福章賓輩一體同稱國宗兄貴妹夫及后宮父母伯叔兄弟輩一體同稱國親細分之后宮父稱國丈后宮母稱外母后宮伯叔稱國外伯國外叔后宮兄弟稱國舅

朕岳丈天下大同稱國丈岳母天下人亦大同稱國岳母國岳與國岳兩相稱自因其長次則稱爲國親兄國親弟千歲岳丈天下人大同稱某千歲貴丈岳母亦大同稱某千歲貴岳母貴岳與貴岳兩相稱自因其等職譬如七南千歲貴岳見九東千歲貴岳則稱東貴親兄又譬如七千歲貴岳會六千歲五千歲貴岳則稱北貴親弟翼貴親弟如此爲兄弟相稱也國岳丈與九千歲七千歲六千歲五千歲之貴岳會見八千歲貴岳兩相稱親家兄親家弟也貴丈人見貴岳則稱某國岳

國岳會貴岳亦因其等職譬如會九千歲貴岳則稱東貴弟會七千歲貴岳稱南貴弟如此則國岳爲兄貴岳爲弟也

國岳母與國岳母兩相稱自因其長次則稱國親嫂國親孀

貴岳母與貴岳母兩相稱自因其等職譬如七千歲貴岳母見九千歲貴岳則稱東貴親嫂又譬如七千歲貴岳母會六千歲五千歲貴岳母則稱北貴親孀翼貴親孀如此則爲嫂孀相賊也

國岳母與九千歲七千歲六千歲五千歲貴岳母會見八千歲貴岳兩相稱自因其長次同稱親家嫂親家孀也貴岳母見國岳母則稱某國岳母

國岳母會貴岳母亦因其等職譬如會九千歲貴岳母則稱東貴孀會七千歲貴岳母則稱南貴孀會六千歲貴岳母則稱北貴孀會五千歲貴岳母則稱翼貴孀如此國岳母爲嫂貴岳母爲孀也各宜凜遵欽此

飲食

賊人不耕種而飽食終日。溯其源皆由虜劫而來。凡到一處。盡封油鹽食物。歸僞典官看守。禮拜日。憑僞照發給各賊館分食。當逐戶抄虜時。雖零星食物。必盡括以去。每過鎮集村莊。必肆行凶橫。動謂不辦飯者必加燒殺。鄉里愚民倉皇失措。誰不欲歛以飲食而保一時之安全。故每至一家。必罄其所有以供啖嚼。其實賊平居之日。擄得何物。多則哺啜狼藉。無亦素餐淡食。若官兵斷其糧道。求粗糲不得。竟有煮皮箱以充飢者。各僞王盤踞江寧。雖有山珍海錯。茫不知爲何物。凡搶得牛羊犬豕。每用刀矛刺殺。不甚洗剔。膏血淋漓。卽置釜中烹而聚食。鄉村多鷄。賊逼人貢獻。或逐家搜捉。及其烹也。亦往往不熟而食。尤可笑者。每以海參炒白菜魚翅炒豆芽燕窩。煮蘿蔔高麗參桂元。煮肉宜用水浸者。或竟乾炒。宜用油煎者。或用水煮。種種顛倒。不可枚舉。廣西老賊嗜食煎炒。絕不飲湯。謂飲湯則腹痛而瀉。每肴加以秦椒。苦辣棘喉。他人不能下嚥。食果亦多不去壳。金橘連肉不知酸。蓮子連心不覺苦。凡遇蔬圃紛紛爭取。或甫生之物。亦不待其長成。掘割恣啖。食盡遂不復栽種。每以白粲喂馬。以代芻豆。所重者惟魚。偶有所得。不敢私食。必進之僞王。各僞王有喜慶事。羣賊進獻食物。亦以魚爲至敬。緣賊氛所過。漁

人引避。因其希而重之。至金陵時。城內多蓄魚池。賊令僞官看守。官曰。典天魚。惟各僞王方准取食。其不與人同嗜者。則狗肉。每敬天父。必用之。如獲得羔豕。必與狗肉同烹。以爲味美無比。更有凶狠之賊。食人肉。飲人血。燔人心肝。以爲饌。至於煙酒。爲賊最禁之物。吸洋煙。謂之犯天條。殺無赦。水旱煙。名曰黃煙。名酒曰潮水。有犯焚吸引者。重則立決。輕亦枷杖。賊令雖嚴。然未能周察。故殺者自殺。而食者自食也。

貢獻

賊之虜劫。任意恣取。非專意打糧。然究以糧爲大宗。賊目每夸言曰。軍行先數百里。即遣人前往。遍張告示。令富者貢獻貲糧。貧者出力。凡賊至境。所張僞示。輒數千言。其起首千餘言。率皆天父天兄。大開天恩。差遣天王。列王。下理世人。速宜悔罪。輸忱等字句。繼此則入鄉民之罪。曰本軍帥於軍行相距數百里之先。即徧張誥諭。令爾百姓富者出資。窮者效力。候太平江山一統。定加擢用。詎爾愚民。不知悔罪。執迷不悟。天兵壓境。來投營者。旣屬寥寥。進貢之人。愈少。此是爾等爲妖魔所迷。本當立遣軍兵屠殺不留。姑念爾某村莊。尙無幫妖。湊勇之事。本軍帥特

再出示差某檢點前來收貢。限三日齊解聖庫賞給貢單。諸兄弟不得騷擾。如有一戶不到。定將全家斬首云云。此示一出。膽怯者無不担負銀錢糧米。絡繹於道。以獻於賊。然賊中章程亦數改。其初陷武昌時。即如此出示設館收貢。然僅行一日。見所獲無幾。遂逐戶搜括。此時蓋專虜城市。仍不擾鄉民。逮後陷安慶江寧。再犯江西北。於城市並不出示收貢。但肆虜劫。於鄉村則仍出示督民進獻。每至一處。打館數日。必盈其欲而去。大抵近水地方。賊收貢之後。役使鄉民搬運至船。而後遣之。其距船較近之處。則逕赴船上交貢。鄉民方幸領得貢單。高揭門首。可爲護符。孰知不數日。二起三起收貢之賊。又至。鄉民以貢單支拒。賊目輒勃然變色。曰。爾以貢單嚇我耶。鄉民穀悚。又復進獻。甚至一月之中。收貢之賊五六至。鄉民疲於奔命。無貢之物。亦漸次略滅。如初貢也。富厚之家。兩千百金。穀米數百石。豬數口。雞數十隻。配以羣物。以次遞減。最後之賊至。卽斗米隻鷄。亦可塞責。惟賊踞之地既久。其另股劫賊。又不知幾次。且已設立鄉官。而下科派之令已。總之鄉民始以進貢得貢單。謂可以安居。故甘輸納。而不知責貢之無已。既知貢單無益。不甘進獻。而不知賊打先鋒。搜刮終無遺也。力田編民。蓋藏雖罄。新穀方登。

猶可接濟。而不知賊以安民爲名。旋立鄉官。時遣催糧之賊。徵取迫於星火也。其虜掠俱詳後說不贅叙。

賊脅鄉民貢獻。而賊中亦專尙貢獻。其僞王僞尊官有喜慶事。羣下醵金爭獻禮物。尋常虜得金帛。亦必層層轉獻。爲散卒虜得重貴之物。不敢絲毫藏匿。必獻之本管官。卑官略爲乾沒。亦不全受。復獻之僞尊官。統歸僞王而後已。次等衣物亦必先挑數事獻於充先生者。其餘方敢自有。攫得新鮮食品。亦必進獻。賊中奏言軍事者寥寥。動卽具稟進貢。其微物如鴨肫二十枚。野鷄一隻。亦必進獻。僞王優語批答。殊可笑也。細詢賊中進獻。亦非得己。甘心從賊者。固欲借此爲進身之資。然而私藏金銀珍物過多。一經僞尊官訪知。突入其館抄之。數其罪而殺之。故雖極垂涎而不敢飽颺也。

### 虜劫

賊之虜劫慘刻萬言難罄。可勝記耶。今請言其顯著共見者。賊諱虜劫之名。曰打先鋒。旣屢經獻貢矣。忽又來打先鋒。賊數十百人住於村內。一半日尙無舉動。覓得此村莊無賴之民。飲食

而撫慰之。轉令勾通富戶奸細劣僕。訪問窖藏所在。許掘得分給。更有官幕家眷。寄住此村。及紳衿爲誰某。一一探訪確切。以奸人引路。於是率醜類逐戶搜虜。糧米錢貫。殊不易藏。每盡數劫去。既得眼線。雖瓦溝所藏之金。水塘所沈之銀。亦無有免者。如所藏甚密。不得其處。則虜其家最尊重之人。或其妻女。用繩懸於梁間。以刀背荆條鞭撻而審詰之。有鞭至死不吐實者。有經懸掛其家不忍。自引賊往起窖者。或本家遠避。祇留老僕應門。賊必拷掠以詰其主之所在。有田畝者。猶屑糠覈以度朝昏。賊知野無遺糧。窖無遺金。於竭澤而漁之後。忽下安民之令。於一州一邑。置監軍一人。徧須二尺長闊之鄉官軍冊。分軍師旅卒兩伍。脅田畝多者充一官。而以貧戶充伍卒。民求一日之安。皆勉從之。比戶皆如懸磬。此後誠不復抄。而責令辦糧及軍中需用各物。僞文一下。迫不可待。少不如意。則執鄉官殺之。其造虐情形。更詳科派條內。總之賊收貢者。先擷其精華也。虜劫淨盡者。使民凍餒不得不從也。立鄉官而科派者。待禾稼之登場。責隨時之供給。且妄冀鄉民爲彼捍衛也。虐民至於此極。天豈忍哉。以上所叙。皆賊虜劫之大概。然亦有略異者。賊於鄉村。從不肆殺。恐鄉民自計。計無復之。與之死門。然於官幕吏胥。避居

家屬及閥閱之家。其抄愈甚。且殺人而焚其廬。並追究收留之家。謂之藏妖。亦焚殺之。凡搜官中公服文案。之亦謂藏妖。肆行屠殺。故賊所過之處。我官幕眷口至無人收留。有露處松林寄宿破廟者。官中服物一概燬棄。每克復一處。官紳覓一頂珠纓冠而不可得。至不能出謁長官。蓋緣陷賊境時。惟恐棄之不速。比比皆是。又將何處購得耶。其待鄉民雖不如是。若鄉民團練與賊鬥敗。賊必慘殺。即或不鬥。知其地曾經團練。或搜出旗幟器械。亦必尋其首事。屠焚之而後已。倡義紳耆縱遠逃幸免。賊過歸家。村民僅存者。羣起而尤之。以爲不團練不致受慘如是之甚。賊如再至。幾欲縛獻之。使急公之士不容於賊。並不諒于民。宜乎團練之無實效也。

科派

鄉民因承平日久。罕見兵革。賊至遷避一空。任賊虜掠。此壬子癸丑冬春間情形。嗣賊蹂躪沿江。往來絡繹。習見不怪。故於每村鎮各舉數耆老。設一公所。賊至作黍。使耆老周旋其間。哀告貧苦。輸納錢數百千。糧數百石。求免窮搜。賊去則按田畝攤之。此科派之始也。賊每以豁免三年錢糧惑我鄉民。虜劫既盡。設立鄉官之後。則又出示曰。天下農民米穀。商賈資本。皆天父所



有全應解歸聖車。大口歲給一石。小口五斗。以爲口食而已。此示一出。被惑鄉民。方如夢覺。然此令究不能行。遂下科派之令。稽查所設鄉官。一軍之地。共有田畝若干。以種一石。終歲責交錢一千文。米三石六斗。核算注於冊籍。存僞州縣監軍處備查。並無上下糧卯限諸章程。催糧之賊。不絕于途。賴數鄉官支吾而供給之。其立鄉官之處。仍舊騷擾者有之。絕不敢私取一物者有之。此則視鄉官爲何如人耳。僑有鄉官。本刁健訟棍。饒有機阱。每備禮物入城。獻於賊目。與之款洽。倚爲護符。但有橫行搶劫之賊。鄉官一稟遙達。且將此賊斬首懸示矣。設策以保鄉黨。其心可原。殊不知此等人。又以賊所科派者。更加斂之。中飽乾沒。仍以鄉民爲魚肉者也。賊之科派。不獨錢米。如行軍時所須各物。皆悉取給於鄉官。偶須鋤鋤千柄。或葦席千張。或划船百隻。僞文一下。咄嗟立辦。民不堪命。怨毒可知。

船運

賊糧取給於上游。悉用船運。不待言矣。然自癸丑五月上犯江西湖北。僅甲寅九月至歲底。此數月中。一清楚境。此外則帆檣如織。無非虜糧之船。無非接濟江寧之船也。然而賊之他竄。或

有別意。於江廣則專爲虜糧。何以知之。今俘獲賊中僞誥諭。一則曰著爾某乘坐水營左三軍船一千三百條配帶兵士前赴江西南昌湖北武昌一帶收貢收糧。解歸天京。不得違誤。再則曰爾某官某弟用船一千八百餘條將黃州漢陽妖魔驚走。所辦糧米速用船全數裝解天京。切勿遲誤。務宜靈變。勿爲妖魔所搶。復有誥諭褒獎張子明等曰。江北黃陂孝感德安等處廣有糧米。爾能駭走妖魔。解到糧米二萬三千石。全行收到。足見靈變有幹。回空船四十五條。仍命後十三軍正典聖。屠福新配帶兵士前來幫同殺妖云云。是賊之所欲得者。專在糧米。於此可見。甲寅五月間。江寧賊糧幾盡。故下令除僞王外概食淖糜。有敢吃飯者斬首。此時武昌若再支一月。江北之兵早逼漢口。使之無所逞。無所虜。船運一絕。則江寧賊黨必內潰矣。賊之伎倆專以船爲用。故近水之處。受害最烈。一經北犯。殲斃無遺。所恃者船多。載賊登陸。以人衆驚我。既陷一處。悉載糧米下行。上年舟師下剿。焚賊七八千艘。賊船運局勢。從此不復振矣。

關權交易

自武昌至江寧。向設四關。賊於武昌蕪湖兩關。因與官軍相持。不暇榷稅。其龍江關則專設提

中關僞官一人。職同指揮九江關。則以九江郡總制陳作霖兼收關稅。賊踞之處。凡有身家商賈。豈肯往來賊境。間有貧民覓蠅頭利。冒死貿易。亦殊爲可憐。嘗詢曾過賊關買人曰。賊之抽稅。無一切章程條例。其報船料也。以船一丈抽稅千錢。所載之貨。分粗貨細貨。粗貨船長一丈。抽稅錢二千。細貨倍之。大率以鹽布棉花煤米爲粗貨。而絲綢蘇貨爲細貨。抽稅之後。給僞船票一張。如遇賊黨。竟可免虜劫。前在九江間陳作霖之子口供云。九江關稅一月不過數千錢。無非附近貧民小賈。以此類推。龍江關之稅不能多獲可知。然賊之交易。頗足資賊。蓋虜得百貨。凡不濟用者。或所虜過多者。皆於村鎮屯積。命三五賊目招徠交易。較常價倍減。鄉民始猶疑懼。既見無他。遂趨利爭赴。或以錢買。或以米豆互易。不數日銷售淨盡。船載錢米。賚送賊巢矣。百貨之中。尤以淮鹽及湖北布棉爲大宗。載江淮之鹽運至興國蕪黃。賣於民間。虜得湖北布疋棉花。復賣與安徽江南百姓。物係虜來。全無貨本。似貢獻虜劫科派而外。即此所入亦復甚鉅。大都交易多在已立鄉官之處。若賊甫陷之地。亦恒招民交易。然默記買貨之多寡。以覘其家之有無。少遲數日。另易一夥。剽賊突入其家。搜刮一空。所買之物亦並取去。此則以交易

爲餌而愚民不覺誤吞者也。

## 口糧

以上所叙皆計賊所入。各口糧則量賊所出焉。賊所入其道四五。迹其出只口糧一事。此賊之所以不虞虧乏歟。僞官雖貴爲王侯。並無常俸。惟食肉有制。僞天王五日給肉十斤。以次遞減。至總制半斤以下無與焉。其僞朝內各官一切衣食皆向各典官衙收給。軍中亦然。虜劫充足。恣取浪擲。來源不繼。亦甘淡泊。然諸劇賊莫不私藏秘積。足以自奉。若卑下僞官。日厭粗糲。有以鹽水爲肴者。每逢禮拜日。僞官必開單赴各典官領敬天父之物。典官亦視其官之當事與否。或盈筐以獻。或羹羹塞責。惟禮拜錢及糧米油鹽。一律皆有定制。僞官每人。每七日給錢百文。散卒半之。每二十五人。每七日給米二百斤。油七斤。鹽七斤而已。雖虜劫極多。亦毫無加增。苦貧乏糧盡之時。或減半給發。或全不給發。如江寧城中。一概吃粥。揚州城中。裘皮箱充飢。此時無禮拜餘米及油鹽可知矣。其另有所謂買菜油錢。則係賊中私情。如總制監軍虜獲金銀。有揮霍者。多隨時散給各館。爲買菜用。難民曾述有率長館百人。係某功勳院下。親見其卒長

每月向僞功勳領取買菜錢多至金一二兩。銀首飾數十兩。其卒長悉數易錢買豬雞以供衆啖。又見具奏中有僞旅帥具章本管僞總制求取買菜錢批發銀五兩者。蓋所發禮拜錢每人每日只取七文。即蔬食亦復不敷。故不日不向僞官領取也。

倉庫

甲寅三四月間。賊陷武昌。迭獲逃出難民及盤獲奸細衆供勘對。其人多正二月由江寧隨賊目來漢口者。內有總典聖梁總典聖庫僞官銜充先生主簿籍者。所言賊之倉庫數目甚爲確切。云僞聖糧館分豐備倉復成倉貢院三處屯貯。截至癸丑年終。共存穀一百二十七萬石。米七十五萬石。江寧羣賊存糧。每月約放米三十餘萬石。合計米穀足支四月。僞聖庫館截止癸丑年底。實存銀二百六十三萬兩。銀首飾一百二十五萬兩。赤金葉條餅錠首飾寶存金十八萬四千七百餘兩。錢三百三十五萬五千串。每月發禮拜錢約二十萬串。油鹽布匹緞帛則不知確數。始聞疑詫。斥爲妄供。姑筆記之。以俟考証。嗣得句容縣探報云。甲寅三月賊糧僅存十餘萬石。銀三十餘萬兩。與前數懸殊。遂沈思其故。似江寧賊衆與被虜之民男婦不下五十萬。

所發錢米。如賊中定制每二十五人每七日發米二百斤。錢一千二百五十文。以此核算。每月應發米十七萬石有奇。錢十二萬串有奇。益以偽官加倍之數。統計所發米錢與難民所述之數。質相去不遠。若如探報所云存米且不足支一月。又豈待五月始下一概吃粥之令乎。賊蹂躪數千里。姑無論官中倉庫處處資賊。卽所虜閭閻貨糧又安可數計。蔓延既廣。既養賊衆。難民又若是之多。據理推勘。似前次供詞並非虛謬。官軍恨賊心甚。故探報多言賊勢窮蹙。貨糧遺竭。然粉飾失實。未足信也。

賊糧一卷本方君詡元認纂方君識高品粹文尤古奧藉隸興國備知鄉民受害情形其分纂此卷爲尤宜今知已呈稿於大帥自以彼著爲善本因全書告成獨缺一卷且夙昔所記及在局諸君亦多知賊糧梗概故補足之俟定本付梓時兩冊互期存其是刪其否不愈善乎賊糧似屬末節然能處斷賊糧處處燒賊糧賢於十萬兵多已

金 山 姚 氏  
明 胎 園 書

纂 彙 情 賦

上海图书馆藏书



A541 212 0023 8082B

28/7/3000

66

上海圖書館

民國十七年二月出版

明清珍本小說集之二

太平天國別史

定價貳角

印行者

北京牛排子胡同一號

廣業書社


寄售處

北京

中央公園大慈商店  
琉璃廠各大書店

上海各

大書店



如直接函購得用一二分郵票另加郵費一成



